

Mapabaxutoje San Pablo toyaquina Titojavabelia

Pacuenia Pablo mapabaxutoje toyaquina Titojavabelia yabara pelivaisi

¹ Xanë Pablone, Dioso pijajivitonënë. Jesucristo ata pijaapóstolenënë. Jesucristo baja cajena nitoroba jivi tayavenonaenexa Diosojavabelia penajamatabëcuenecopatsinexa. Dioso baja cajena tajëvelia itapeta bajarapamonae penajamatabëcuenecopatsinexa Diosojavabelia. Jesucristo nexata nitoroba bajarapamonae tatsipaebinexa pexaniajailivaisi Dioso pitabarata bajarapamonae xaniavaetsia pejinavanapaenexa. ² Jesucristo nitoroba tatsipaebinexa pexaniajailivaisi bajarapamonae ata pexainaenexa matacabi apo pevereverecaejava. Pepo bajayatami, Dioso abaxë nacua ata itsa apo exanae, Dioso najumecapanepaeya jumaitsi vajanacarajutsinexa matacabi apo pevereverecaejava. Dioso baja cajena apo penajumetsënëtsinë. ³ Nexata baja Dioso pecaejëtsimatacabita, bajarapalivaisi nacayapëtaeyaexana. Nexata Dioso, vajanacacapanepaenënexa, xanë nitoroba jivi tatsipaebinexa bajarapalivaisi. Nexata xanë daxitajivi tsipaebaponajë bajarapalivaisi. ⁴ Tito, betaxënatomëcuenia tacataenë. Tsipaji cayavenonatsi xamë ata nejumecovënëtsinexa Jesucristo pelivaisi.

Catoyaquinatsi mapabaxutoje. Catojitsipatsi vaxa Dioso pecayavenonaenexa, Jesucristo ata, vajanacacapanepaenënexa, pecayavenonaenexa. Catojitsipatsi pecaitaxutotsoniataenexa, pecajamatabëcuene xanepanaeyaexanaenexanua.

Pacuenia Pablo Tito puenetanuta Cretatunaeto nacuata petonacuenebinexa Dioso pijacuene yabara pelivaisi

⁵ Capuenetatsi baja cajena Cretatunaeto nacuajavata. Capuenetatsi nexanaponaponaenexa, xua abaxë catosajina nejamatabëcueneasaëyaexanaenexa ^{Dioso} pejumecovënëtsivi. Caitorobatsinua baja cajena caetomarapijivi canacujitsia nitapetsinexa ancianovinexa, ^{Dioso} pejumecovënëtsivi pevetsivinexa. ⁶ Nejumenajamatabënapire pacuenia caitorobatsi. Itsa itapetsijitsiamë ponë ancianonënexa, itapetsianame ponë toajibitsi jivi peyabaraneconitsijavanexatsi. Caeva pepitsinë. Pexi Dioso petojumecovënëtsinëtsi. Pexi apo petoacujirubejenëtsi. Pacuenia ata pexi itoroba, pejumecovënëtsinëtsi. ⁷ Tsipaji ponë itapetsianame ancianonënexa, Dioso pijacuene tonacuenebiana. Bajaraxuata ancianonënexa, itapetsianame ponë xaniavaetsia peponapon-aenë, pianeconijibinë. Beayajamatabëcuenenë apo penataenë. Bepijia apo pianaepanaenë. Apo piapaenë piaitajibinexa. Pevëna pebi apo pebenë. Apo pejitsipaenë itsajivi ata yamaxëitojorobiaya pevecuanacobetoxotsinexa palata. ⁸ Ancianonënexa, xanepana ponë xaniavaetsia copiapitabiaba pijabota pepatsivi.

Pexaniacuene pexanaenë. Xaniavaetsia copiaya penajamatabëxainaenë pacuene exanaejitsia. Xaniavaetsia peponaponaenë jivi pitabarata, Dioso ata pitabarata. Pexanaponaponaenë daxita pacuenia Dioso pejumelivaisita itoroba jivi pexanaenexa. Pecaëjëpaenëtsi penajamatabëcueneataitsinexa pibisiacuene pexanaeyaniva. ⁹ Ancianonënexa, xanepana ponë casaë tsaponaponaе pejumecovënëtsijava palivaisi tsipaebatsi, pexaniajailivaisi. Bajarapacuenia nexata bajaraponë caëjëpaenatsi itsamonaе ata pejamatabëcuenebabatsinexa pexaniajailivaisita. Caëjëpaenatsinua xaniavaetsia pejumecanaviatsinexa pamonaе jamatabëcuenenavëxaniabaya pibisiacuenia baracuaicuajai Dioso pejumelivaisi. Nexata ancianonë xaniavaetsia itsa jumecanaviatsiana pamonaе pibisiacuenia baracuaicuajai Dioso pejumelivaisi, bajarapamonaе ata jumecovënëtsiana Dioso.

¹⁰ Bajarapitsijamatabëcuenevi itapetaponae-name ancianovinexa. Tsipaji raja Cretatunaeto nacuata, Dioso pejumecovënëtsivi tuatuajëta, ayaubitsaëto jinavanapa apo pejumecovënëtsivi pacuenia itorobatsi pevetsivitsi. Bajarapamonaeyajuvënëvi ayaubitsaëto judíovi. Bajarapajudíovi jumai tsabiabi: "Pamonaе apo judíovi ata Jesús pelivaisi itsa jumecovënëta, bajarapamonaе ata benaperabëcaucubiaexana," jai tsabiabi. Bajarapajudíovi natsiquejemalivaisi saya cuaicuajai tsabiabi. Nexata yamaxëitojorobapona Dioso pejumecovënëtsivi. ¹¹ Bajarapajudíovi bejumeitavetame. Tsipaji

saya penajumetsënëtsilivaisi jivi tsipaebapona Dioso apo pejitsipaecuenia. Bajarapajudíovi, caebopijivi canacujitsia, Dioso pejumecovënëtsivi, najamatabëcuene epatajérerëcaeyaexanapona Dioso pejumecovënëtsijavavecua. Bajarapajudíovi penajumetsënëtsilivaisi jivi tsipaebapona saya pemamatotsinexatsi palata.

¹² Bajayata pina livaisi bitso peyapëtaenëmi ponapona Cretatunaeto nacuata. Nexata pina bajaraponëmi jumaitsi Cretatunaeto nacuapijivi yabara mapacueniaje: “Cretatunaeto nacuapijivi cajena bitso penajumetsënëtsivi. Bitso piacujirubejevi. Ayaijavana jamatabëxaeyabiaba. Bitso afaetabinua,” jai pina cajena bajayata Cretatunaeto nacuapijinëmi. ¹³ Xaniajai baja cajena pacuenia jumaitsi bajaraponëmi. Bajara jamatabëcueneitsi Cretatunaeto nacuapijivi. Tito, nexata xamë asaëyata itorobare bajarapamonae xaniavaetsia penajamatabëcuencopatsinexa Diosojavabelia. ¹⁴ Itavere bajarapamonae penamuxunaevetsiyaniva judíovi pijasalinaivimi pijalivaisixi. Itaverenua bajarapamonae pejumecovënëtsiyaniva pacuenia itorobaponatsi pamonae copaba pexaniajailivaisi pejumecovënëtsijavami.

¹⁵ Pajivi jumecovënëta Jesucristo pesivatëpaejavatsi, bajarapajivi ajamatabëcunexuirajibi. Bajarapajivi daxita xua tane, épexaniacuenia sivanajamatabëxaina. Nexata itsacuenejavayo ata apo jamatabëcuenebijanaetsi. Pajivi pijinia apo jumecovënëtsi Jesucristo pesivatëpaejavatsi, bajarapajivi ajamatabëcunexuire. Nexata bajarapajivi daxita xua tane, pibisiacuenia sivanajamatabëxaina. Nexata

daxitacuene jamatabëcuenebijianatsi. Pibisiacuene exanabiabi ata, jamatejema saya ponapona.

16 “Xanë rabaja bitso Dioso yapëtaniji,” jai tsabiabi. Itsiata baitsi jane bajarapamonae pibisiacuene exanavanapa. Nexata nayapëtane Dioso apo peyapëtaejava. Bajarapamonae itoya Dioso. Bajarapamonae apo jumecovënëtsi pacuenia Dioso itorobatsi. Nexata apo caëjëpaetsi itsacuenejavayo ata pexaniacuene pexanaenexa.

2

Pacuenia Pablo Tito itoroba pexanialivaisi jivi petsipaebaponaenexa yabara pelivaisi

1 Tito, xamë jivi livaisi itsa tsipaebabia biabianame, tsipaebabia biabianame ëpexaniajailivaisi.

2 Perujupebijivi muxujiobabia biabianame penajamatabëcuene reviabinexa. Muxujiobabia biabianame xaniavaetsia pejinavanapaenexa jivi peyaiyataenexatsi. Muxujiobabia biabianame penajamatabëcuene cataitsinexa pibisiacuene pexanaeyaniva. Muxujiobabia biabianame pexaniajailivaisi, Jesús pelivaisi, xaniavaetsia pejumecovënëtsinexa. Muxujiobabia biabianame daxitajivi asivaya petaenexa. Muxujiobabia biabianame, itsamonae bejiobia exanae atatsi Dioso pejumelivaisi yabara, pevajënaeyabelia pecasaänenexa Dioso pejumecovënëtsijava.

3 Bajara pijinia pacuenia muxujiobabia biabianame perujupetiriavi ata jamatabëcuene reviaya pejinavanapaenexa Dioso pitabarata. Bajarapamonae pibisiacuenia itsamonae apo bebaracuaicuajai. Apo biaitajibi tsabiabinua.

Bajarapapetiriavi itsamonae pexaniacuene betsitaexanavanapa. ⁴ Nexata perujupetiriavi itsamonae pexaniacuene itsa tsitaexanavanapa, jamatabëcuenecujarubiana pecovëpipediriavi ata xaniavaetsia pamonajivi piasivanexa, penacoxi-asivanexanua. ⁵ Perujupetiriavi itorobianame pemuxujobiabinexa pecovëpipediriavi ata penajamatabëcuenereviabinexa, pexaniajamatabëcuene ata penajamatabëxainaenexa. Perujupetiriavi muxujobiabiabianame pijabo ata xaniavaetsia pevetsinexa, pexaniacuene ata pexanabiabinexa, pamonajivi ata xaniavaetsia pejumecovënëtabiabinexa. Nexata juya perujupetiriavi muxujobiabiabiana pecovëpipediriavi xaniavaetsia pejinavanapaenexa. Nexata bajarapamonae xaniavaetsia itsa jinavanapaenexa, itsajivi ata pibisiacuenia Dioso pejumelivaisi apo baracuaicuajai tsane.

⁶ Bajara pijinia pacuenia muxujobiabiabianame pevëjéavi penajamatabëcuenecataitsinexa pibisiacuene pexanaeyaniva. ⁷ Xamë xaniavaetsia bajarapamonae ëpexaniacuene tsitaexanaponaponaename. Nexata bajarapacuenia daxitajivi cacuenetaena xaniavaetsia neponaponaejava. Pexanialivaisi itsa tsipaebabiabianame, tsipaebabiabianame nejamatabëëthëtovetsina nexaniajajumeta jamatabëcuenereviaya. ⁸ Xaniavaetsia tsipaebabiabianame pexaniajailivaisi. Bajarapacuenia itsa exanabiabianame, pecaitoyavi ata aura tsane. Tsipaji ajibi tsane pecayabararananeconitsiaexanaejava.

⁹ Pajivi bedajubicuenia canajetatsi pet-

onacuenebabibinexa amoneya pijatuxanenë, bajarapajivi muxujiobabianame pijatuxanenë pejumecovënëtsinexa daxita pacuenia itorobatsi. Muxujiobabianame xaniavaetsia pijatuxanenë petonacuenebabibinexa pesivajamatabëcuenebarëyanexatsi. Pëtsa bajarapajivi apo jejai pijatuxanenë pitorobi-javatsi. Pëtsa jumaitsi pijatuxanenëjavabelia: "Jume raja. Bajarapacuenia apo xanepanae tacatoexanaenexa. Mara Jane pacuenia xanepana tacatoexanaenexaje," jai pëtsa. ¹⁰ Pëtsa bajarapajivi muetsia pita pijatuxanenë pijajava. Biji rajane pijatuxanenëjavabelia tsitanajamatabëcueneitajëtsi daxitacuene xaniavaetsia petonacuenebabijava nacobetoxotsinejeva. Bajarapacuenia itsa exanaena bajarapajivi, nexata daxitajivi yapëtaena Dioso vajanacacapanepaenënexa pejumelvaisi pexaniajailivaisicuene.

¹¹ Dioso baja cajena nacayapëtaeyaexana vajanacaitaxutotsoniataejava. Nexata Dioso nacacapanepaena daxitanacuapijjivitsi. ¹² Dioso vajanacayapëtaeyaexanaexae vajanacaitaxutotsoniataejava vajanacacapanepaenexa, nexata becopatatsi pibisiacuene vajaexanaejavami. Bitsos vajajitsipaejava ata mapanacuapijjicuene vajaxainaenexa, becopatatsi. Dioso rajane jitsipa mapanacuata nayajivitaeya vajajinavanapaenexa pibisiacuene vajaexanaeyaniva. Nexata Dioso pejitsipaejuenia betoexanavanapatsi. Dioso cujunaviaya xaniavaetsia bejinavanapatsi. ¹³ Bajarapacuenia Dioso cujunaviaya xaniavaetsia bejinavanapatsi

paepatojebi Jesucristo copiaevetavanapatsi icatsia pepatsijavanexatsica. Nexata icatsia pamatacabí Jesucristo patsianica, sivajamatatabécuenebaréyatsi tsane. Pacuenia Dioso tajévelia najumecapanepaeya nacajumaitsi Jesucristo pepatsijavanexatsica, bajarapacuenia xaniajai Jesucristo patsianica. Jesucristo rabaja cajena, pinijiDiosonë, vajanacacapanepaenexa. Bajaraponë penivenivenaecotia yajavapat-sianica. ¹⁴ Bajaraponë pijacuata tonacaeveta pijavajabitsaë pebeyaxuabinexatsi. Nexata Jesucristo itsa beyaxuabatsi, pijanata nacacомуата pibisiacuene vajaexanaeneconivecua. Nacavecuaajibiaexana baja bajarapaneneconimi Jesucristo pijajivitsi vajanacaexanaenexa. Nacajitsipaeyaexananua épexaniacuene Jesucristo vajatoexanaenexa.

¹⁵ Daxita bajarapacuenia muxujiobaponame-name. Jamatabécuenebabataponaename asaëya bajarapamonae. Asaëya muxujiobiabiabianame pibisiacuene itsa exanapona. Bajarapacuenia muxujiobiabiabianame Dioso pecatocopatsixae bajarapacuenia nexanaponaenexa. Pëtsa copatame itsajivi ata bijiaya pecataenexa.

3

*Pacuenia Dioso pejumecovënëtsivi pexaniacuene
bexanavanapa yabara pelivaisi*

¹ Dioso pejumecovënëtsivi, Cretatunaeto nacuapijivi, najamatatabénapitsiaexanaename yaiyataeya pejumecovënëtsinexa gobierno pitorobilivaisi, pejumecovënëtsinexanua gobierno

pijajivi ata. Itorobianamenua bajarapamonaе pexanaenexa daxitaxua pexaniacuene.
² Muxujibabiabianame bajarapamonaе itsajivi ata pibisiacuenia pebaracuaicuajaiyaniva. Muxujibabiabianame bajarapamonaе, itsamonaе itsacueniabi atatsi, pecuenecanaviat-siyaniva. Muxujibabiabianame bajarapamonaе pexaniajamatabëcuenia pebarëcuaicuajainexa daxitajivijavabelia. Itorobianamenua daxitajivivecua bevelajamatabëcuenevi nataeya pejinavanapaenexa.

³ Itsa abaxë vaxaitsi ata Dioso apo jume-covënëtsitsi, saya picani jema jinavanapatsi. Apo exanavanapaetsi pacuenia Dioso nacaitoroba. Apo exanavanapaetsinua pacuenia nacuaevetsivi ata nacaitoroba. Naxuabiaya saya jinavanapatsi Dioso pejumelivaisivecua. Pibisiacuene, pacuene vajavitota jamatabëexanatsi, exanavanapatsi. Pacuene ata nacajamatabëcuenebarëyayaexana, exanavanapatsi. Pibisiacuene bitso exanavanapatsi itsamonaejavabelia. Itsamonaе cuenecaëbabiabatsi. Daxitajivi nacaitoya tsabiabi. Vaxaitsi ata namataenetsia naitoyatsi tsabiabi. ⁴ Bajara vajaitsivimi ata, itsiata Dioso, vajanacacapanepaenënexa, nacayapëtaeyaexana vajanacaitaxutotsoniatae-cuene. Nacayapëtaeyaexananua pacuenia ata Dioso nacaasiva daxitatsi mapanacuapijivitsije.
⁵ Dioso nacacapanepaena vajaneconivecua. Itsiata baitsi jane pexaniacuene vajaexanaejava yabara, Dioso apo nacacapanepae tsane. Jume baja cajena. Dioso raja nacacapanepaena tsipaji nacaitaxutotsoniatane. Nexata

nacajamatabëcuenequiata. Dioso vajanacaitaxutsoniataexae, nacacapanepaena. Espíritu Santo pejamatabëcueneta pejanajamatabëcuenevitsi baja nacaexana. ⁶ Dioso baja cajena ayaicuenia vajanacayavenonaenexa, Espíritu Santo nacatoitorobica vaxaitsijavabetsica. Bajarapacuenia Dioso Espíritu Santo nacatoitorobica Jesucristo vajanacacapanepaenënexa pejamatabëctsoniatane. Nexata nacajamatabëcuenequiata. Dioso vajanacaitaxutotsueneta. ⁷ Bajaraxuata Dioso vaxaitsi yabarajumaitsi: “Bajarapamonae baja aneconijibia taniji,” jai Dioso. Tsipaji nacaitaxutsoniatane. Nexata vaxaitsi xainaenatsi matacabi apo peverevererecaejava, xua copiaevetavanapatsi.

⁸ Daxita baja palivaisi pacatoyaquinatsi, pexaniajailivaisi cajena. Nexata jitsipajë ajumsaëya jivi netsipaebaponaenexa bajarapalivaisi. Nexata Dioso pejumecovënëtsivi épexaniacuene pexanaenexa pejamatabëcueneenaenexatsi. Bajarapalivaisi bitso xanepana daxitajivi pejumecovënëtsinexa. ⁹ Nexata navecuaitavetsianame saya jema natsiquejemalivaisixi itsamonaec pecabarëcuaicuajaiyaniva. Navecuaitavetsianamenua judíovi pijasalinaivimi pevënëxi yabarajec pecabarëcuaicuajaiyaniva. Navecuaitavetsianamenua Dioso Moiséspijinëta penajumecopatsilivaisi yabarajec anaeya pecajumenotsiyaniva. Bajarapacuenia pecabarëcuaicuajaijava apo xanepanae tsipae itsacuenejavayonexa ata.

¹⁰ Itsamonaec penajumetsënëtsilivaisi jivi tsipaebapona. Nexata bajarapamonae

penajumetsënëtsilivaisita Dioso pejumecovënëtsivi navecuanatsanaeyaexanapona. Bajarapamonae jumeitavetsianame. Anijatobeje ata jumeitavetsianame. Nexata bajarapamonae copatsiana penajumetsënëtsilivaisi jivi petsipabponaejava. Jumeitavetsi atamë, itsiata itsa apo cajumecovënëtsi tsane, nexata bajarapamonae itorobianame itsajavabelia peponaenexa.

11 Yapëtaneme rabaja mapacueneje. Ponë peneta copata pexaniajailivaisi pejumecovënëtsijavami, pibisiacuene exana. Nexata bajaraponë naneconita Diosojavabelia pibisiacuene pexanaexae.

*Pacuenia icatsia Pablo itsalivaisi toitoroba Tito
asaëya Dioso petonacuenebinexa yabara pelivaisi*

12 Catoitorobialiatsi Artemas. Itsa jume, catoitorobialiatsi Tíquico. Bajaraponë itsa patsialia xamëjavabelia, nexata xamë bepija renamë tsane xanëjavaberena. Nacaxitajarabi-anatsibeje Nicápolis tomarata. Daxita emarapae raja ponaponaenajë Nicápolis tomarata.

13 Itsa baja pacavecuaponaena Zenasbeje Apolosbeje, nexata yavenonaename pacuenia namatavenonaenabeje pijanamutobejenexa. Zenas raja abogadonë, penaneconitsivi peyavenonaeyacuaicuajainë. Rajutsianame pacuenia namatavenonabeje, itsacuenejavayo ata petosajinaeyanivatsibeje itsa najetarucabeje namuto.

14 Pamonae vaxaitsi pexanialivaisi tsipaebatsi, bajarapamonae tojitsipajë peyapëtaenexa xua pexaniacuene. Nexata épexaniacuene pexanaenexa. Nexata bajaramonae tojitsipajë asaëya penacuenebinexa,

peyavenonaenexa pamonae bitso bepejiobivi.
Pëtsa saya bajarapamonae jinavanapa
nacuenebinejeva.

*Pacuenia Pablo itsamonaे jamatabënajina
yabara pelivaisi*

¹⁵ Daxita pamonae yajavaponaponajë,
cajamatabënajinalia. Pajamatabënajinaliajë daxita
pamonae pataniasivavi, Dioso pejumecovënëtsivi.
Pacatovajëtatsi Diosojavabelia daxita paxamë
Dioso papecayavenonaenexa.

Dios pejumelivaisibaxuto pejanalivaisibaxuto New Testament in Guahibo

copyright © 2011 Wycliffe Bible Translators, Inc.

Language: Guahibo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guahibo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

**PDF generated using Haiola and XeLaTeX on 11 Nov 2022 from source files
dated 29 Jan 2022
bc03f416-faf8-5000-bfb5-5ca8a3fa98cf**